
Маънавиятга эҳтиёж Навоийни билганга балли!

Буюк шоир ва мутафаккир Алишер Навоий ҳаёти ва ижодини ўрганиш, унинг юксак инсонпарварлик ғоялари акс этган асарлар мазмун-моҳиятини халқимиз, айниқса, ёш авлод онгига чуқурроқ сингдириш маънавий-маърифий ислохотларнинг муҳим йўналишидир.

Ўзбекистон Миллий тикланиш демократик партияси томонидан “Навоий ворислари” республика кўрик-танловининг мунтазам ўтказилиши ана шу эзгу мақсадларга хизмат қилмоқда.

Марғилон шаҳридаги Эркин Воҳидов номидаги ижтимоий фанларга ихтисослаштирилган мактаб-интернатида ушбу танловнинг вилоят босқичи бўлиб ўтди.

Кўрик-танлов аввалида сўзга чиққан Ўзбекистон Миллий тикланиш демократик партияси Марказий кенгаши Ижроия қўмитаси девони бўлим бошлиғи Ҳамдам Ниёзов, партия вилоят Кенгаши раиси Умиджон Жабборовлар мазкур беллашувнинг буюк шоир ва мутафаккир Алишер Навоий ҳаёти ва ижодини ўрганиш, буюк аجدодимизнинг маънавий меросини кенг оммалаштиришда муҳим омил бўлаётганини эътироф этдилар.

Кўрик-танловнинг вилоят босқичида ҳар бир туман, шаҳардан Алишер Навоийнинг камида 50 та ғазалини ёд олган 11 ёшдан 16 ёшгача бўлган жами 20 нафар мактаб ўқувчилари ва уларнинг устозлари иштирок этди. Иштирокчилар энг кўп ғазал ёд олиш, ғазални беҳато ва ифодали ўқиб бериш, ғазал матнининг насрий баёни (ёзма шарҳи)ни ярата олиш ҳамда ғазал матнидаги тушуниш қийин бўлган сўзларни изоҳлаб бериш каби шартлар орқали ўз имкониятларини синовдан ўтказдилар.

Низом шартлари бўйича ўз маҳоратини намоён этган 3 нафар ғолиблар номи аниқланди. Якуний натижаларга кўра, Риштон туманидаги 19-умумтаълим мактабининг 9-синф ўқувчиси Ойдиной Жўраева кўрик-танловнинг мутлоқ ғолибаси сифатида эътироф этилди ва республика босқичига йўлланма олди.

Фарғона туманидаги 47-умумтаълим мактабининг 9-синф ўқувчиси Рухшона Холматова 2-ўрин, Тошлоқ туманидаги 15-умумтаълим мактабининг 9-синф ўқувчиси Дилшода Алижонов 3-ўрин билан тақдирланди.

Ғолибларга партия вилоят Кенгаши ҳамда Марғилон шаҳар ҳокимлигининг қимматбаҳо ва эсдалик совғалари топширилди.

Мадаминжон СОЛИЖОНОВ.

Шарофиддин ҲАКИМОВ олган сурат.

2018-11-24 09:51:34